



Broj: 07-08-22-19210/26
Sarajevo, 17.04.2026. godine

Na osnovu člana 70. st. 1. i 2. Zakona o organizaciji organa uprave u Federaciji BiH (*"Službene novine Federacije BiH"*, broj 35/05), člana 4. stav (1) Pravilnika o postupku i kriterijima za dodjelu namjenskih sredstava u oblasti šumarstva iz Budžeta Kantona Sarajevo (*"Službene novine Kantona Sarajevo"*, br. 34/22 i 5/25) i Odluke Vlade Kantona Sarajevo broj: 02-04-15131-9/26 od 09.04.2026. godine, Ministarstvo privrede Kantona Sarajevo objavljuje

JAVNI POZIV
za dodjelu namjenskih sredstava za projekte iz oblasti šumarstva iz Budžeta Kantona Sarajevo za 2026. godinu

1. PREDMET JAVNOG POZIVA

Prijava projekata iz oblasti šumarstva, a čija će se realizacija finansirati/sufinansirati iz Budžeta Kantona Sarajevo za 2026. godinu sa pozicije Ministarstva privrede Kantona Sarajevo.

2. PRAVO UČEŠĆA NA JAVNOM POZIVU

Pravo učešća na ovom javnom pozivu imaju:

- a) Kantonalno javno preduzeće za gospodarenje državnim šumama na području Kantona Sarajevo "Sarajevo-šume" d.o.o. Sarajevo (*u daljem tekstu: KJP "Sarajevo-šume"*), Kantonalna javna ustanova za zaštićena prirodna područja Kantona Sarajevo (*u daljem tekstu: KJU za zaštićena područja*), privredna društva koja imaju sjedište, obavljaju djelatnost i realizuju projekte na području Kantona Sarajevo na vlastitom šumskom zemljištu (*u daljem tekstu: privredna društva*), obrazovne institucije koje imaju sjedište, djeluju, i implementiraju projekte na području Kantona Sarajevo (*u daljem tekstu: obrazovne institucije*);
- b) udruženja i fondacije, registrovana u Ministarstvu pravde i uprave Kantona Sarajevo i ona koja su registrovana u skladu sa zakonom na entitetskom ili državnom nivou, a koja imaju sjedište, djeluju i implementiraju projekte na području Kantona Sarajevo, a registrovani programski ciljevi i zadaci su im na uzgoju šuma, uzgoja i zaštite divljači, te zaštite i unaprijeđenja okoliša (*u daljem tekstu: udruženja i fondacije*);
- c) fizička lica vlasnici privatnih šuma i šumskog zemljišta na području Kantona Sarajevo, a koja imaju prebivalište i realizuju projekte na području Kantona Sarajevo (*u daljem tekstu: fizička lica*).

3. PROJEKTI KOJI SE MOGU PRIJAVITI

3.1. Projekti koje mogu prijaviti KJP "Sarajevo-šume", KJU za zaštićena područja, privredna društva i obrazovne institucije

KJP "Sarajevo-šume", KJU za zaštićena područja, privredna društva i obrazovne institucije mogu prijaviti projekte koji se odnose na:

- a) obnovu šuma od posljedica elementarnih nepogoda, prenamnoženja insekata, požara i slično,
- b) unaprjeđenje proizvodnje šumskog reprodukcionog materijala,
- c) očuvanje i unaprjeđenje bioraznolikosti šumskih ekosistema,
- d) ulaganje u rekonstrukciju degradiranih i izdanačkih šuma,
- e) projektovanje, rekonstrukciju, izgradnju i nabavku nove šumarske infrastrukture,
- f) certificiranje gospodarenja šumama,
- g) kupovinu zemljišta u svrhu podizanja novih šuma uključujući i podizanje plantaža brzorastućih vrsta drveća,
- h) pošumljavanje goleti i krša,
- i) unaprjeđenje lovstva,
- j) unaprjeđenje opštekorisnih funkcija šuma,
- k) naučno istraživački rad i stručno obrazovanje kadrova iz djelokruga rada šumarstva,
- l) uvođenje ekološko prihvatljivih tehnologija u procesu gospodarenja šumama i zaštiti okoliša,
- m) provođenje procesa deminiranja šuma i šumskog zemljišta,
- n) zaštitu šuma od požara, štetnih šumskih insekata i biljnih bolesti,
- o) nabavku opreme i izgradnju protivpožarne šumske infrastrukture,
- p) i druge projekte iz oblasti šumarstva koji su u funkciji ruralnog razvoja.

KJU za zaštićena područja, privredna društva i obrazovne institucije imaju pravo na Javni poziv prijaviti najviše dva projekta

Ukupan iznos novčanih sredstava za sve projekte KJP "Sarajevo-šume", KJU za zaštićena područja, privrednih društava i obrazovnih institucija iznosi 4.026.720,00 KM.

3.2. Projekti koje mogu prijaviti udruženja i fondacije

Udruženja i fondacije mogu prijaviti projekte koji se odnose na:

- a) čišćenje, uređenje i pošumljavanje šumskog zemljišta,
- b) očuvanje i unapređenje bioraznolikosti šumskih ekosistema,
- c) uzgoj i zaštitu divljači,
- d) izgradnju šumske i lovne infrastrukture,
- e) jačanje ekološke kulture građana.

Udruženja i fondacije imaju pravo na Javni poziv prijaviti jedan projekat.

Ukupan iznos novčanih sredstava za sve projekte udruženja i fondacija iznosi 50.000,00 KM.

3.3. Projekti koje mogu prijaviti fizička lica

Fizička lica mogu prijaviti projekte koji se odnose na:

- a) pošumljavanje šumskih goleti (nabavka sadnog materijala),
- b) popunjavanje šumskih kultura (nabavka sadnog materijala),
- c) zaštitu šuma od štetnih šumskih insekata i biljnih bolesti (nabavka opreme za zaštitu šuma od štetočina).

Fizička lica imaju pravo na javni poziv prijaviti jedan projekat.

Ukupan iznos novčanih sredstava za sve projekte fizičkih lica iznosi 5.000,00 KM.

4. PRIJAVA NA JAVNI POZIV

Lica iz tačke 2. ovog javnog poziva prilikom prijave na Javni poziv obavezno dostavljaju:

- a) PRIJAVNI OBRAZAC, koji je sastavni dio ovog pravilnika i koji se može dobiti u Ministarstvu ili preuzeti sa web stranice Ministarstva;
- b) IZJAVU na propisanom obrascu, koja je sastavni dio ovog pravilnika i koja se može dobiti u Ministarstvu ili preuzeti sa web stranice Ministarstva;
- c) PRIJEDLOG PROJEKTA na propisanom obrascu, koji je sastavni dio ovog pravilnika i koji se može dobiti u Ministarstvu ili preuzeti sa web stranice Ministarstva;

5. POTREBNA DOKUMENTACIJA

5.1. Potrebna dokumentacija za KJP “Sarajevo-šume”, KJU za zaštićena područja, privredna društva i obrazovne institucije

KJP “Sarajevo-šume”, KJU za zaštićena područja, privredna društva i obrazovne institucije, dužni su uz prijavu na javni poziv dostaviti slijedeću dokumentaciju:

- a) izvod iz sudskog registra, ne stariji od 3 mjeseca od dana podnošenja prijave,
- b) uvjerenje/potvrdu o urednom izmirenju direktnih poreza, doprinosa za penzijsko-invalidsko i zdravstveno osiguranje izdato od Poreske uprave Federacije Bosne i Hercegovine, ne starije od 3 mjeseca od dana podnošenja prijave,
- c) uvjerenje/potvrdu o urednom izmirenju indirektnih poreza, izdato od Uprave za indirektno oporezivanje Bosne i Hercegovine, ne starije od 3 mjeseca od dana podnošenja prijave (ukoliko je u sistemu PDV-a),
- d) ovjerenu izjavu o visini sredstava s kojima će sufinansijer učestvovati u finansiranju projekta ili ugovor o sufinansiranju projekta (ako postoji partner u projektu),
- e) projekat sa budžetom ovjeren i potpisan od strane podnosioca.

Privredna društva, pored dokumentacije iz stava (1) ovog člana, dostavljaju i slijedeću dokumentaciju:

- a) zemljišnoknjižni izvadak za parcelu na kojoj će se realizirati projekat, kao dokaz da je podnosilac zahtjeva vlasnik zemljišta,
- b) kopiju katastarskog plana za parcelu na kojoj će se realizirati projekat,
- c) nalaz i mišljenje pravnog lica za obavljanje stručnih poslova u privatnim šumama sa specifikacijom troškova.

Dokumentacija se prilaže u originalu ili ovjerenj kopiji.

5.2. Potrebna dokumentacija za udruženja i fondacije

Udruženja i fondacije dužna su uz prijavu na javni poziv dostaviti slijedeću dokumentaciju:

- a) rješenje o upisu u Registar udruženja kod Ministarstva pravde i uprave Kantona Sarajevo ili drugog nadležnog organa u Federaciji Bosne i Hercegovine iz kojeg je vidljivo sjedište udruženja na području Kantona,
- b) uvjerenje o poreznoj registraciji,
- c) karton deponovanih potpisa iz banke osoba odgovornih za finansije,
- d) ovjerena izjava o visini sredstava s kojima će sufinansijer učestvovati u finansiranju projekta ili ugovor o sufinansiranju projekta (ako postoji partner na projektu),
- e) bilans stanja i bilans uspjeha za prethodnu kalendarsku godinu, a za udruženja koja su osnovana u tekućoj godini početni bilans,
- f) projekat sa budžetom ovjeren i potpisan od strane podnosioca.

Dokumentacija se dostavlja u originalu ili ovjerenj kopiji i ne može biti starija više od tri mjeseca računajući od dana objavljivanja ovog javnog poziva.

5.3. Potrebna dokumentacija za fizička lica

Fizička lica dužna su uz prijavu na javni poziv dostaviti slijedeću dokumentaciju:

- a) potvrdu/uvjerenje o prebivalištu (CIPS),
- b) zemljišnoknjižni izvadak za parcelu na kojoj će se realizirati projekat,
- c) kopiju katastarskog plana za parcelu na kojoj će se realizirati projekat,
- d) nalaz i mišljenje pravnog lica za obavljanje stručnih poslova u privatnim šumama sa specifikacijom troškova,
- e) ovjerenu izjavu o visini sredstava s kojima će korisnik ili drugi zainteresovani subjekt učestvovati u sufinansiranju projekta,
- f) projekat sa budžetom ovjeren i potpisan od strane podnosioca i pravnog lica za obavljanje stručnih poslova u privatnim šumama,
- g) izjavu pravnog lica za obavljanje stručnih poslova u privatnim šumama da su granice šumskog zemljišta u privatnom vlasništvu na kojem će se realizirati projekat na terenu vidne i na propisan način obilježene,
- h) ukoliko je podnosilac zahtjeva suvlasnik zemljišta dužan je dostaviti ovjerene punomoći suvlasnika kojim se ovlašćuje za poduzimanje radnji u cilju realizacije projekta

Dokumentacija se dostavlja u originalu ili ovjerenoj kopiji i ne može biti starija više od tri mjeseca računajući od dana objavljivanja ovog javnog poziva.

6. ROK, NAČIN I ADRESA PODNOŠENJA PRIJAVA

Rok za podnošenje prijave iznosi 30 dana od dana objavljivanja ovog javnog poziva u dnevnim novinama i na web stranici Ministarstva privrede Kantona Sarajevo (www.mp.ks.gov.ba)

Prijave na Javni poziv predaju se u zatvorenoj koverti direktno na centralni protokol Kantona Sarajevo ili se dostavljaju u zatvorenoj koverti preporučeno putem pošte na adresu:

Kanton Sarajevo
Ministarstvo privrede
Reisa Džemaludina Čauševića 1
71 000 Sarajevo

sa naznakom: ***“NE OTVARATI” - prijava po javnom pozivu: “Odabir korisnika za dodjelu namjenskih sredstava u oblasti šumarstva iz Budžeta Kantona Sarajevo”***

7. DODATNE INFORMACIJE

Postupak po ovom javnom pozivu provest će se u skladu sa Pravilnikom o postupku i kriterijima za dodjelu namjenskih sredstava u oblasti šumarstva iz Budžeta Kantona Sarajevo („Službene novine Kantona Sarajevo“, br. 34/22 i 5/25).

Kontakt telefon za dodatne informacije je 033 550 285 ili neposredno u službenim prostorijama Ministarstva privrede – Uprave za šumarstvo, ulica Branilaca Sarajeva broj 21.

MINISTAR

Zlatko Mijatović